

Morning Dogri (NSD) National News Bulletin 10-02-2025

आकाशवाणी

- प्रधानमंत्री नरेन्द्र मोदी होर अज्ज 11 बजे परीक्षा पे चर्चा च विद्यार्थिं कन्नै गल्लबात करगंन।
- प्रधानमंत्री नरेन्द्र मोदी होर अज्जै थमां फ्रांस ते अमरीका दे दौरे पर जा'रदे न। पेरिस च ओह फ्रांस दे राष्ट्रपति हुंदे कन्नै ए.आई एक्शन शिखर सम्मेलन दी सह-अध्यक्षता करगंन।
- राष्ट्रपति द्रौपदी मुर्मू होर अज्ज महाकुंभ दा दौरा करगंन।
- रक्षा मंत्री राजनाथ सिंह होर अज्ज बेंगलुरु च एशिया दे सारें शा बड्डे ऐरो इंडिया शो दा उद्घाटन करगंन।
- हमास कन्नै होए दे लड़ाईबंदी समझौते दे तैह्त इजराइली फौज नेतजारिम कोरीडोर थमां पिच्छे हटी गई ऐ।
- क्रिकेट च भारत नै कटक च खेड्डे गे दुए इक दिने आले अंतर्राष्ट्रीय मैच च इंग्लैंड गी चऊं विकटें कन्नै हराई दित्ता ऐ।

<><><><><><>

Pariksha Pe Charcha

परीक्षा पे चर्चा दा 8मां संस्करण कल नमीं दिल्ली दे भारत मंडपम च आयोजित कीता जाग। इस चर्चा च हर बरे प्रधानमंत्री नरेन्द्र मोदी होर बच्चें कन्नै उन्दे मतेयानें दे बारै च गल्लबात करदे न। सब्बनें राज्यें ते केंद्र शासित प्रदेशें थमां 36 विद्यार्थिं गी प्रधानमंत्री हुंदे कन्नै गल्लबात करदे लेई तालेआ गेदा ऐ। इस बरे कोई 5 करोड़ लोक मुल्खै दे बक्ख-बक्ख हिस्से थमां इस कार्यक्रम कन्नै जुड्डन। कल बड्डलै 11 बजे प्रधानमंत्री होर बच्चें कन्नै गल्लबात करगंन। परीक्षा पे चर्चा इक ऐसे मंच दा कम्म करदी ऐ जित्थे प्रधानमंत्री सिद्धे विद्यार्थिं, उन्दे अध्यापकें ते माता-पिता कन्नै बी गल्लबात करदे न ते मतेयानें गी लेइयै उन्दे तनाव ते शक-शुबे गी दूर करदे न। इस कार्यक्रम दा सिद्धा प्रसारण आकाशवाणी, दूरदर्शन, स्वयं, स्वयंप्रभाव, प्रधानमंत्री हुंदे दफतर ते यू-ट्यूब ते सूचना ते शिक्षा मंत्रालय दे सोशल मीडिया चैनलें पर बी उपलब्ध रौहग।।

<><><><><><>

PM-France Visit

प्रधानमंत्री नरेंद्र मोदी होर अज्ज संजा'लै पेरिस दौरे पर जा'रदे न। पेरिस च ओह फ्रांस दे राष्ट्रपति मैक्रों हुं'दे कन्नै ए.आई एक्शन शिखर सम्मेलन 2025 दी सांझे तौरा पर अध्यक्षता करडन। शासन च आर्टिफिशल इंटेलीजेंस दा इस्तेमाल करने दे बारै च पेरिस च अज्जै थमां 2 दिनें ए.आई एक्शन शिविर सम्मेलन 2025 शुरू होआ'रदा ऐ। एहदे च केई वैश्विक नेता, उद्योग जगत दे मन्ने—परमन्ने दे लोक ते केई शोधकर्ता हिस्सा लेंगन। प्रधानमंत्री नरेंद्र मोदी होर फ्रांस दे राष्ट्रपति इमैनुअल मैक्रों हुं'दे कन्नै इस शिखर सम्मेलन दी सह अध्यक्षता करने लेई अज्ज फ्रांस लेई रवाना होंगन। इस आयोजन दा मकसद वैश्विक ए.आई नीतियें गी आकार देने दे कन्नोकन्नी, नवाचार ते नैतिक जिम्मेदारी दा आपूं च तालमेल यकीनी बनाना ऐ। इस आयोजन च 100 शा मते मुख्खें दे नुमाइंदें, उच्ची सतह दे शोधकर्ता, कारोबारी जगत थमां मन्ने—परमन्ने दे लोक ते सिविल सोसायटी दे सदस्ये शिरकत करंगन ते शासन, अर्थ बवस्था ते मौलिक अधिकारें पर ए.आई दे असर बारै चर्चा करंगन।

<><><><><><>

President Kumbh

राष्ट्रपति द्रौपदी मुर्मू होर कल प्रयागराज च महाकुम्भ जांगन। ओह गंगा जमना ते सरस्वती दे त्रिवेणी संगम च पवित्र चलोबी लांगन। राष्ट्रपति हुंदा अक्षयवट ते बड़े हनुमान मंदर जाने दा बी कार्यक्रम ऐ। उनें डिजिटल महाकुम्भ अनुभव केंद्र च आधुनिक तकनीकें दे इस्तेमाल राएं कुम्भ दा गहराई ते विस्तार च अनुभव करंगन। उत्तर प्रदेश दे मुख्यमंत्री योगी आदित्यनाथ होर बी उन्दे कन्नै होंगन।

<><><><><><>

Aero India

ऐरो इंडिया शो दा 15मां संस्करण अज्जै थमां बेंगलुरु च शुरू होआ'रदा ऐ। केन्द्रीय रक्षा मंत्री राजनाथ सिंह होरें आखेआ जे 5 रोजा इस कार्यक्रम च भारत दी रक्षा समर्थ क्षमताएं ते स्वदेशी नमीं काहडें दा प्रदर्शन कीता जाग।

कर्टेन रेसर कार्यक्रम थमां पैहले कल बेंगलुरु च मीडिया कन्ने गल्ल करदे होई मंत्री होरें आखेआ जे एशिया दे सब्बने थमां बड्डे इस शो राएं भारतीय एमएसएमई ते स्टार्टअप गी वैश्विक निर्माताएं कन्ने सांझे उद्यम जां सैह्योग स्थापत करने दे मौके हासल होंगन।

<><><><><><>

India-EGYPT

भारत ते मिस्र राजस्थान दी महाजन फील्ड फायरिंग रेंज च सांझे फौजी अभ्यास “साइक्लोन 2025” आयोजित करगंन जेहड़ा अज्ज शुरू होग ते 23 फरवरी तोड़ी चलोग। इस सांझे फौजी अभ्यास दा मकसद रेगीस्तान दे माहोल च विशेष बलें दी पेशेवर महाजन ते भाएं क्षमता च बाद्धा करदे होई भारत ते मिस्र बश्कार रक्षा साथ सैह्योग च इलाफा करना ऐ।

<><><><><><>

Israel

हमास कन्ने होए दे लड़ाईबंदी समझौते दे तैहत इजराइली फौज नेतजारिम कोरीडोर थमां पिच्छे हटी गई ऐ। एहदी तस्दीक हमास नै कीती ऐ। फिलस्तीन दी पैहल नै इलाके गी अपने पियंत्रण च लेई लैता ऐ तां जे फिलस्तीन दी आओजाई दा प्रबंध कीता जाई सकै। तकरीबन चार मील लम्मे नेतजारिम कोरीडोर गी इजराइली फौज जंग दी शुरूआत च. गै अपने कब्जे च लेई लैता हा जेहदे कन्ने उत्तरी गाजा, दक्खनी गाजा थमां कटोई गेआ हा।

<><><><><><>

Assam CM Singapur

असम दे मुखमंत्री हिमंत बिस्वा सरमा औंदी 25 ते 26 फरवरी गी गुवहाटी च आयोजित होने आले एडवनटेज असम 2.0 निवेश ते बुनियादी ढांचे सरबंधी शिखर सम्मेलन 2025 गी बढावा देने लेई सिंगापुर दी 2 दिन दी यात्रा पर रौंहगन। इस शिखर सम्मेलन च प्रधानमंत्री नरेन्द्र मोदी, केन्द्रीय मंत्री, उद्योगपति ते कंपनियां शामिल होंगन। एहदे थमां पैहले मुखमंत्री होरें सम्मेलन दी तैआरिएं दा आकलनकरने आस्तै गुवहाटी दे लोक सेवा भवन च इक उच्च सतह दी समीक्षा बैठक कीती।

<><><><><><>

Manipur CM

मणिपुर दे मुखमन्त्री एन.बिरेन होरें कल अपने औहदे थमां स्तीफा देई दित्ता। उनें राजभवन च राज्यपाल अजय कुमार भल्ला होरें गी अपना स्तीफा सौंपेआ। 2017 थमां ओह बीजेपी सरकार दी मणिपुर च अगुवाई करा'रदे न। उनें अपना एह स्तीफा उत्थें चला'रदी गतिविधिएं ते पार्टी दे अंदर दी उथल-पूथल दे चलदे दित्ता ऐ।

<><><><><><>

Chhatisgarh Maoists

छत्तीसगढ़ दे बीजापुर जिले च सुरक्षाबलें कन्नै होए दे टाकरे च 31 माओवादी मारे गे न। मारे गेदे सारे माओवादिएं दियां लोथां बरामद करी लैतियां गेदियां न। इस टाकरे च 2 जवान बी शहीद होए न ते 2 लवान घासयल बी होए न। घासल जवानें गी बेहतर इलाज लेई रायपुर लेता गेआ ऐ। उनें दौनें दी हालत खतरे थमां बाहर दस्सी जा'रदी ऐ।

<><><><><><>

Cricket

क्रिकेट च भारत नै इंग्लैंड बश्कार खेड्डी जा'रदी त्रै इक दिने आले अंतर्राष्ट्रीय मैचें दी श्रृंखला दे कल चऊ विकटें कन्नै हराई दित्ता ऐ। एहदे कन्नै भारत नै श्रृंखला च 2-0 दी अजय बढ़त बनाई लैती ऐ। इंग्लैंड आस्सेआ दित्ते गेदे 305 रंजें दे लक्ष्य गी भारत टीम नै 44.3 ओवरें च 6 विकटें दे नुक्सान उप्पर हासल करी लैता। कप्तान रोहित शर्मा नै 119 रंजें दी पारी खेड्डी जदके शुभमन गिल नै 60एं रंज बनाए।

<><><><><><>